



PARLIMEN MALAYSIA



RANG UNDANG-UNDANG

Perkhidmatan Telekomunikasi (Syarikat Pengganti) 1985

DR.20/1985

Naskhah Sahih—Bahasa Malaysia

RANG UNDANG-UNDANG

bernama

Suatu Akta untuk mengadakan peruntukan bagi meletakkan harta, hak-hak dan liabiliti-liabiliti Kerajaan Malaysia berhubungan dengan perkhidmatan telekomunikasi pada suatu syarikat, untuk membuat perkiraan-perkiraan kewangan bagi syarikat itu, untuk mengadakan peruntukan bagi perkara-perkara berhubungan dengan kakitangan dan bagi perkara-perkara lain yang berkaitan dengannya.

I

I

MAKA INILAH DIPERBUAT UNDANG-UNDANG oleh Duli Yang Maha Mulia Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen, dan dengan kuasa daripadanya, seperti berikut :

BAHAGIAN I

PERMULAAN

1. Akta ini bolehlah dinamakan Akta Perkhidmatan Telekomunikasi (Syarikat Pengganti) 1985 dan hendaklah mula berkuatkuasa pada tarikh yang ditetapkan oleh Menteri melalui pemberitahuan dalam *Warta*.

2. Dalam Akta ini, melainkan jika konteksnya meng-

hendaki makna yang lain—
“Perbadanan” ertinya Menteri Kewangan yang diperbadankan oleh Ordinan Menteri Kewangan (Pemerbadanan) 1957;

Tajuk ringkas dan mula berkuatkuasa.

Tafsiran.

Ord.
46/57.

“syarikat pengganti” ertinya syarikat yang kepadanya dipindahkan di bawah seksyen 3 semua harta, hak dan liabiliti berkenaan dengan perkhidmatan telekomunikasi, selain daripada tanah-tanah terkecuali dan harta ditetapkan, yang kepadanya Kerajaan Malaysia berhak atau tertakluk;

“tarikh pemindahan” ertinya tarikh apabila dipindahkan kepada syarikat pengganti semua harta, hak dan liabiliti tertentu berkenaan dengan perkhidmatan telekomunikasi, selain daripada tanah-tanah terkecuali dan harta ditetapkan, yang kepadanya Kerajaan Malaysia berhak atau tertakluk.

BAHAGIAN II

MELETAKHAK HARTA, DLL., PADA SYARIKAT PENGGANTI

Meletakhak
harta, dll.,
Kerajaan
Malaysia
berhubu-
ngan
dengan per-
khidmatan
telekomuni-
kasi pada
syarikat
pengganti.

3. (1) Menteri boleh, dengan perintah yang disiarkan dalam *Warta*, menetapkan suatu tarikh pemindahan dan pada tarikh itu, semua harta, hak dan liabiliti berkenaan dengan perkhidmatan telekomunikasi, selain daripada tanah-tanah terkecuali dan harta ditetapkan, yang kepadanya Kerajaan Malaysia berhak atau tertakluk sebelum sahaja tarikh itu, hendaklah menjadi, menurut kuasa seksyen ini, harta, hak-hak dan liabiliti-liabiliti syarikat pengganti.

(2) Dalam seksyen ini, “tanah-tanah terkecuali” ertinya tanah-tanah yang terletak di luar kawasan mana-mana Wilayah Persekutuan yang ditubuhkan oleh undang-undang dan yang mana—

(a) adalah tanah Kerajaan yang diberimilik oleh sesuatu Negeri kepada Persekutuan bagi maksud-maksud persekutuan, tanah yang diberimilik oleh sesuatu Negeri kepada Persekutuan selepas pengambilan paksa atau tanah berimilik yang diambil oleh sesuatu Negeri daripada seorang tuan punya persendirian dengan persetujuan untuk Persekutuan, di bawah Perkara 83 Perlembagaan;

(b) adalah dirizabkan bagi maksud-maksud persekutuan di bawah Kanun Tanah Negara, Ordinan Tanah, Sabah, Kanun Tanah, Sarawak, atau mana-mana undang-undang tanah sebelumnya dan tanah di Negeri-Negeri dalam Malaysia Barat, selain daripada Melaka dan Pulau Pinang, yang dianggap sebagai dirizabkan bagi maksud-maksud persekutuan di bawah Perkara 166 (4) Perlembagaan;

Akta 56/65.
Sabah
Bab 68.
Sarawak
Bab 81.

(c) di Melaka dan Pulau Pinang, adalah diduduki bagi maksud-maksud persekutuan pada Hari Merdeka menurut kuasa Perkara 166 (3) Perlembagaan; dan

(d) di Negeri-negeri Sabah dan Sarawak, adalah diduduki bagi maksud-maksud persekutuan pada Hari Malaysia di bawah seksyen 75 Akta Malaysia 1963.

Akta 26/63.

(3) Dalam seksyen ini, "harta ditetapkan" ertinya harta dari apa-apa perihalan, sama ada harta alih atau tak alih yang Menteri boleh, melalui perintah yang disiarkan dalam *Warta*, mengisytiharkan sebagai perlu untuk disimpan oleh Kerajaan Malaysia bagi maksud menjalankan tugas dan melaksanakan fungsi Ketua Pengarah Jabatan Telekom, Malaysia di bawah Akta Telekomunikasi 1950.

Akta 20.

(4) Bagi mengelakkan keraguan—

(a) apa-apa sebutan mengenai harta berkenaan dengan perkhidmatan telekomunikasi yang kepadanya Kerajaan Malaysia berhak adalah sebutan mengenai tanah, harta selain daripada tanah-tanah terkecuali dan harta ditetapkan dan hak-hak dalam tindakan kepunyaan Kerajaan Malaysia sama ada terletak di Malaysia atau di tempat lain; dan

(b) apa-apa sebutan mengenai hak-hak dan liabiliti-liabiliti mengenai perkhidmatan telekomunikasi yang kepadanya Kerajaan Malaysia berhak atau tertakluk adalah sebutan mengenai hak-hak yang kepadanya Kerajaan Malaysia berhak atau, mengikut mana yang berkenaan, liabiliti-liabiliti yang kepadanya Kerajaan

Malaysia tertakluk, sama ada di bawah undang-undang Malaysia atau mana-mana negeri di luar Malaysia dan termasuklah hak-hak dan liabiliti-liabiliti yang berbangkit di bawah mana-mana pinjaman bagi perkhidmatan telekomunikasi.

(5) Tiap-tiap hak dalam tindakan yang dipindahkan oleh subseksyen (1) kepada syarikat pengganti boleh, selepas tarikh pemindahan, dituntut, didapatkan kembali atau dikuatkuasakan oleh syarikat itu dalam namanya sendiri dan tidaklah perlu bagi syarikat itu atau bagi Kerajaan Malaysia memberi notis kepada orang yang terikat dengan hak dalam tindakan itu tentang pemindahan yang dilakukan oleh subseksyen itu.

(6) Tiap-tiap hak dan liabiliti yang dipindahkan oleh subseksyen (1) kepada syarikat pengganti boleh, pada dan selepas tarikh pemindahan, dituntut, didapatkan kembali atau dikuatkuasakan oleh atau terhadap syarikat itu dalam namanya sendiri dan tidaklah perlu bagi syarikat itu atau bagi Kerajaan Malaysia memberi notis kepada orang yang hak atau liabilitinya dipindahkan oleh seksyen ini tentang pemindahan itu.

(7) Dalam hal hak-hak dan liabiliti-liabiliti yang berbangkit di bawah mana-mana pinjaman yang terletak pada syarikat pada tarikh pemindahan, syarikat itu boleh membuat apa-apa perkiraan atau perjanjian mengenai hak-hak dan liabiliti-liabiliti tersebut dengan Kerajaan Malaysia atau mana-mana pihak ketiga.

Pelupusan tanah.

4. (1) Bagi mengelakkan keraguan, jika apa-apa kepentingan mengenai tanah terletak pada Persekutuan bagi maksud-maksud telekomunikasi, adalah sah bagi Persekutuan, menurut Perkara 86 Perlembagaan, memberikan—

(a) dalam hal sesuatu kepentingan mengenai tanah di Malaysia Barat, pajakan atas tanah itu bagi sesuatu tempoh yang tidak melebihi sembilan puluh sembilan tahun atau, dalam hal tanah yang dipegang di bawah pajakan Negeri atau pajakan Mukim, bagi sesuatu tempoh yang tidak melebihi baki tempoh pajakan itu; dan

(b) dalam hal sesuatu kepentingan mengenai tanah di Sabah atau Sarawak, sub-pajakan menurut peruntukan-peruntukan Ordinan Tanah, Sabah atau Kanun Tanah, Sarawak, mengikut mana yang berkenaan,

kepada syarikat pengganti bagi maksud perkhidmatan telekomunikasi yang hendaklah dinyatakan dalam terma-terma pajakan atau sub-pajakan itu.

(2) Bagi maksud subseksyen (1) (a), "pajakan" hendaklah mempunyai erti yang diberikan kepadanya dalam Kanun Tanah Negara, dan bagi maksud subseksyen (1) (b), "sub-pajakan" hendaklah mempunyai erti yang terpakai baginya di bawah Ordinan Tanah, Sabah atau Kanun Tanah, Sarawak, mengikut mana yang berkenaan.

5. (1) Sebagai akibat daripada letakhak pada syarikat pengganti menurut kuasa seksyen 3 akan semua harta, hak dan liabiliti berkenaan dengan perkhidmatan telekomunikasi, selain daripada tanah-tanah terkecuali dan harta ditetapkan, yang kepadanya Kerajaan Malaysia berhak atau tertakluk, syarikat pengganti hendaklah menerbitkan sekuriti-sekuriti syarikat itu sebagaimana yang Menteri Kewangan dari semasa ke semasa mengarahkan—

Pemegangan
permulaan
Kerajaan
dalam
syarikat
pengganti.

(a) kepada Perbadanan; atau

(b) kepada mana-mana orang yang berhak menghendaki supaya diterbitkan sekuriti-sekuriti itu berikutan pengumpulan permulaannya kepada Perbadanan.

(2) Menteri Kewangan tidak boleh memberi arahan di bawah subseksyen (1) pada ketika syarikat pengganti telah berhenti daripada dimiliki sepenuhnya oleh Kerajaan Malaysia.

(3) Sekuriti-sekuriti yang dikehendaki supaya diterbitkan menurut seksyen ini hendaklah diterbitkan atau diumpukkan pada masa dan atas terma-terma tentang pengumpulan sebagaimana yang Menteri Kewangan arahkan.

(4) Syer-syer yang diterbitkan menurut seksyen ini—

(a) hendaklah mempunyai nilai nominal sebagaimana yang Menteri Kewangan arahkan; dan

(b) hendaklah diterbitkan sebagai dibayar penuh dan dianggap bagi maksud-maksud Akta Syarikat 1965 seolah-olah ianya telah dibayar oleh sebab pembayaran nilai nominalnya kepada syarikat pengganti.

Akta 125.

(5) Menteri Kewangan boleh melupuskan apa-apa sekuriti yang diterbitkan atau apa-apa hak kepada sekuriti-sekuriti yang diumpukkan pada mulanya kepada Perbadanan menurut seksyen ini.

(6) Apa-apa dividen atau lain-lain jumlah wang yang diterima oleh Perbadanan sebagai hak daripada, atau apabila dilupuskan, apa-apa sekuriti atau hak yang diperolehi menurut kuasa seksyen ini hendaklah dibayar ke dalam Kumpulan Wang Disatukan.

Pelaburan
Kerajaan
dalam
sekuriti-
sekuriti
syarikat
pengganti.

6. (1) Menteri Kewangan boleh pada bila-bila masa, memperolehi—

(a) sekuriti-sekuriti syarikat pengganti atau mana-mana subsidiari syarikat pengganti; atau

(b) hak-hak untuk melanggan apa-apa sekuriti yang sedemikian itu.

(2) Menteri Kewangan boleh melupuskan apa-apa sekuriti atau hak yang diperolehi di bawah seksyen ini.

(3) Apa-apa perbelanjaan yang ditanggung oleh Menteri Kewangan sebagai akibat daripada peruntukan-peruntukan seksyen ini hendaklah dianggap sebagai pelaburan dan dibenarkan di bawah seksyen 8

Akta 61.

(3) (a) (iv) Akta Prosedur Kewangan 1957.

(4) Apa-apa dividen atau lain-lain jumlah wang yang diterima oleh Perbadanan sebagai hak daripada, atau apabila dilupuskan, apa-apa sekuriti atau hak yang diperolehi di bawah seksyen ini hendaklah dibayar ke dalam Kumpulan Wang Disatukan.

(5) Duti setem tidak boleh dikenakan berkenaan dengan apa-apa pertambahan modal syarikat pengganti yang—

(a) dilakukan dengan penerbitan syer-syer yang diumpukkan pada ketika syarikat pengganti dimiliki sepenuhnya oleh Kerajaan; dan

(b) diperakui oleh Perbendaharaan sebagai telah dilakukan dengan penerbitan syer-syer yang dilanggan oleh Menteri Kewangan di bawah subseksyen (1) (a).

7. (1) Menteri Kewangan boleh melantik orang-orang sebagaimana dia fikirkan layak untuk bertindak sebagai penamanya bagi maksud-maksud seksyen 5 atau 6 dan—

Penjalanan
fungsi-fungsi
Menteri
Kewangan
melalui
penama-
penama.

(a) sekuriti-sekuriti syarikat pengganti boleh diserahkan di bawah seksyen 5 kepada mana-mana penama Menteri Kewangan yang dilantik bagi maksud-maksud seksyen itu atau kepada mana-mana orang yang berhak menghendaki supaya diterbitkan sekuriti-sekuriti itu berikutan pengumpulan permulaannya kepada mana-mana penama tersebut; dan

(b) mana-mana penama tersebut yang dilantik bagi maksud-maksud seksyen 6 boleh memperolehi sekuriti-sekuriti atau hak-hak menurut seksyen itu.

(2) Mana-mana orang yang memegang apa-apa sekuriti atau hak sebagai penama Menteri Kewangan menurut kuasa subseksyen (1) hendaklah memegang dan mengurusnya atas terma-terma dan dengan cara yang Menteri Kewangan arahkan.

8. (1) Jika Menteri Kewangan mengarahkan sedemikian pada bila-bila masa sebelum syarikat pengganti berhenti daripada dimiliki sepenuhnya oleh Kerajaan, sejumlah wang, tidak melebihi untung kehasilan terkumpul Jabatan Telekom, Malaysia, sebagaimana yang dinyatakan dalam arahan itu, hendaklah dibawa oleh syarikat pengganti kepada suatu rizab, yang dalam seksyen ini disebut sebagai “rizab statutori”.

Struktur
kewangan
syarikat
pengganti.

(2) Rizab statutori itu hanya boleh digunakan oleh syarikat pengganti untuk membayar syer-syer belum terbit syarikat itu yang akan diumpukkan kepada anggota-anggota syarikat itu sebagai syer-syer bonus dibayar penuh.

(3) Bagi maksud-maksud apa-apa akaun statutori syarikat pengganti—

(a) letakhak yang dilakukan menurut kuasa seksyen 3 hendaklah dianggap sebagai letakhak akan semua harta, hak dan liabiliti, selain daripada tanah-tanah terkecuali dan harta ditetapkan, yang kepadanya Jabatan Telekom, Malaysia, berhak atau tertakluk sebelum sahaja penghujung tahun perakaunan genap terakhir Jabatan Telekom, Malaysia, yang berakhir sebelum tarikh pemindahan dan sebagai telah dilakukan selepas sahaja penghujung tahun itu; dan

(b) nilai apa-apa aset dan amaun apa-apa liabiliti Jabatan Telekom, Malaysia, yang dianggap sebagai telah diletakhak pada syarikat pengganti menurut kuasa perenggan (a) hendaklah dianggap sebagai nilai atau, mengikut mana yang berkenaan, amaun yang diuntukkan kepada aset atau liabiliti itu bagi maksud-maksud penyata akaun yang bersamaan yang disediakan oleh Jabatan Telekom, Malaysia berkenaan dengan tahun itu.

(4) Bagi maksud-maksud apa-apa akaun statutori syarikat pengganti, amaun yang hendak dimasukkan berkenaan dengan mana-mana butiran hendaklah ditentukan seolah-olah apa-apa jua yang dilakukan oleh Jabatan Telekom, Malaysia, sama ada secara memperoleh, menilai semula atau melupuskan apa-apa aset atau menanggung, menilai semula atau menyelesaikan apa-apa liabiliti, atau membawa apa-apa amaun kepada apa-apa peruntukan untuk rizab, atau selainnya, telah dilakukan oleh syarikat pengganti.

(5) Tanpa menjejaskan keluasan peruntukan subseksyen (4), amaun yang hendak dimasukkan dari semasa ke semasa dalam mana-mana rizab syarikat pengganti sebagai merupakan untung kehasilan terkumpulnya hendaklah ditentukan seolah-olah apa-apa

untung yang dihasilkan dan disimpan oleh Jabatan Telekom, Malaysia, telah dihasilkan dan disimpan oleh syarikat pengganti.

(6) Sebutan-sebutan dalam seksyen ini mengenai akaun statutori syarikat pengganti adalah sebutan-sebutan mengenai apa-apa akaun yang disediakan oleh syarikat pengganti bagi maksud-maksud mana-mana peruntukan Akta Syarikat 1965.

(7) Bagi maksud-maksud seksyen ini, "tahun perakaunan genap" ertinya sesuatu tahun perakaunan yang berakhir pada 31hb Disember.

BAHAGIAN III

PERUNTUKAN-PERUNTUKAN BERHUBUNGAN DENGAN KAKITANGAN

9. (1) Syarikat pengganti hendaklah menerima ke dalam penggajiannya pada tarikh pemindahan tiap-tiap orang yang, sebelum sahaja tarikh pemindahan, adalah anggota kakitangan Jabatan Telekom, Malaysia, dan yang telah diberi pilihan oleh Kerajaan Malaysia dan telah memilih untuk berkhidmat sebagai pekerja syarikat itu. Kakitangan.

(2) Tiap-tiap orang sedemikian yang memilih di bawah subseksyen (1) untuk berkhidmat sebagai pekerja syarikat pengganti hendaklah digaji oleh syarikat itu atas terma-terma dan syarat-syarat perkhidmatan yang tidak kurang baiknya daripada terma-terma dan syarat-syarat perkhidmatan yang kepadanya dia berhak sebelum sahaja tarikh pemindahan.

HURAIAN

Adalah menjadi polisi Kerajaan Persekutuan untuk menswastakan Jabatan Telekom, Malaysia. Rang Undang-Undang ini bertujuan melaksanakan hasrat Kerajaan dalam perkara ini.

2. *Fasal 1* membuat peruntukan mengenai tajuk ringkas dan tarikh mula berkuatkuasa dan *fasal 2* adalah berkenaan dengan tafsiran.

3. *Fasal 3* memperuntukkan bahawa, pada tarikh pemindahan yang akan ditetapkan oleh Menteri dan disiarkan dalam *Warta*, semua harta, hak dan liabiliti berkenaan dengan perkhidmatan telekomunikasi, selain daripada tanah-tanah terkecuali dan harta

ditetapkan, yang Kerajaan Malaysia berhak dapat atau tertakluk kepadanya, hendaklah menjadi harta, hak-hak dan liabiliti-liabiliti syarikat pengganti.

Subfasal (2) mentafsirkan "tanah-tanah terkecuali" dan *subfasal (3)* mentafsirkan "harta ditetapkan".

4. *Fasal 4* memperuntukkan bahawa adalah sah bagi Persekutuan untuk melupuskan apa-apa kepentingan mengenai tanah yang terletak padanya bagi maksud-maksud telekomunikasi.

5. *Fasal 5* memperuntukkan supaya sekuriti-sekuriti syarikat pengganti diterbitkan atau diumpukkan kepada Menteri Kewangan yang diperbadankan oleh Ordinan Menteri Kewangan (Pemerbadanan) 1957 dan berkenaan dengan pelupusannya.

6. *Fasal 6* memberi kuasa kepada Menteri Kewangan untuk memperoleh sekuriti-sekuriti syarikat pengganti atau apa-apa sekuriti mana-mana subsidiari syarikat itu atau hak untuk melanggankan sekuriti yang sedemikian dan berkenaan dengan pelupusannya.

7. *Fasal 7* memberi kuasa kepada Menteri Kewangan melantik penama-penama untuk menjalankan fungsi-fungsinya yang tertentu.

8. *Fasal 8* memperuntukkan struktur kewangan syarikat pengganti.

9. *Fasal 9* membuat peruntukan mengenai perkara-perkara yang berkaitan dengan kakitangan dengan tiap-tiap orang yang telah diberi pilihan oleh Kerajaan Malaysia dan yang telah memilih untuk berkhidmat sebagai pekerja syarikat pengganti hendaklah digaji oleh syarikat itu atas terma-terma dan syarat-syarat perkhidmatan yang tidak kurang baiknya daripada terma-terma dan syarat-syarat yang dia berhak dapat sebelum sahaja tarikh pemindahan.

IMPLIKASI KEWANGAN

Rang Undang-Undang ini tidak akan melibatkan Kerajaan dalam apa-apa perbelanjaan wang tambahan. [PN. (U²) 1340.]